

Tupela Rot i Stap

God Em i oana na bos bilong dispela graun.

- God yet i bin wokim dispela graun wantaim olgeta samting i stap long em.
- God yet i wokim manmeri na God yet i save givim laip long yumi wan wan.
- Na God i givim olgeta samting Em i wokim long dispela graun long yumi bilong yusim.

God Em i oana na bos bilong dispela graun na long yumi tu na long olgeta samting yumi save

yusim. Long dispela as yumi mas i stap aninit long Em.

“God i bin wokim graun na olgeta samting i stap long em, Em i BIKPELA bilong heven na graun..... Em tasol i save givim laip na win na olgeta samting long ol manmeri.” **Aposel 17:24-25.**

“Yu BIKPELA na God bilong mipela, na Yu inap tru long olgeta man i ken amamas long Yu, na litimapim nem bilong Yu, na i stap aninit long strong bilong Yu. Long wanem? Yu bin wokim olgeta samting. Long laik bilong Yu yet Yu wokim na i kamap, na nau dispela olgeta samting i stap.” **Revelesen 4:11.**

Tasol.....

Olgeta manmeri i bin givim baksait long God na ol i no laik God i ken i bosim ol.

- Yumi manmeri yumi yet yumi laik bosim laip bilong yumi yet. Yumi no amamas long God i ken i bosim **laip** bilong yumi, na **sindaun** bilong yumi, na **raun** bilong yumi, na **bodi** bilong yumi, na **marit** bilong yumi, na **tingting** bilong yumi, na **olgeta samting** bilong yumi. (**Sin** em i nem bilong dispela pasin.)
- Tasol, yumi no fit long bosim olgeta samting bilong yumi. Nogat. Taim yumi yet i bosim ol samting bilong yumi, orait olgeta samting na olgeta sindaun bilong yumi i save **bagarap hariap** tumas.

“I no gat wanpela manmeri i stretpela, nogat tru. I no gat wanpela manmeri i gat gutpela tingting, na i no gat wanpela manmeri i save

bihainim God. Olgeta manmeri ol i bin givim baksait long God, olsem na, olgeta i kamap manmeri nogut. I no gat wanpela manmeri i save mekim gutpela pasin. Tru, i no gat wanpela.” Rom 3:10-12.

“Olgeta manmeri ol i wankain tasol. Ol i manmeri bilong mekim sin, na ol i kamap sot long glori bilong God.” Rom 3:22-23.

Na yu gat wanem tingting? God i ken i larim ol manmeri i givim baksait long Em o Em i gat toktok long dispela?

God i no inap larim ol manmeri i givim baksait long Em.

- God i no save pasim ai bilong Em long dispela pasin ol manmeri i mekim. Nogat. Em i gat toktok long dispela samting.

“Pe bilong sin em i dai.” **Rom 6:23.**

“Long dispela taim (taim bilong kam bek bilong Jisas) Em (God) bai mekim save long olgeta manmeri i no save long God na i no bihainim gutnius bilong BIKPELA Jisas bilong yumi. Ol bai kisim bagarap olsem: ol bai i stap autsait na ol i no inap lukim BIKPELA na ol i no inap lukim lait bilong strong bilong Em, na ol bai bagarap i go i go olgeta oltaim oltaim.” **2 Tesalonaika 1:8-9.**

“(God) Em i bel hat long ol pasin we ol manmeri ol i save givim baksait long Em, na Em i bel hat long ol pasin nogut bilong ol.” **Rom 1:18.**

God i mekim strongpela toktok. Tasol.....

God i bin mekim wanpela wok bilong sevim ol sampela sin manmeri na ol i no ken i kisim dispela pe bilong sin.

God i mekim wanem wok?

- God i salim Pikinini Man bilong Em, Jisas, i kam long dispela graun bilong kisim pe bilong sin bilong sin manmeri.
- Olgeta taim Jisas i stap aninit long God na Em i no bin sakim wanpela tok bilong God. Em i wanpela stretpela stretpela man olgeta. Tasol Em i dai. Na dai em i pe bilong sin. Olsem na, taim Jisas i kisim dai, Em i kisim pe bilong sin bilong ol narapela manmeri.
- God i transferim sin bilong sin manmeri i go long Jisas. Na Em i transferim pe bilong sin

bilang ol i go long Jisas wantaim. Olsem na, taim Jisas i dai long diwai kros God i bin tilim pe bilang sin bilang ol dispela manmeri long Jisas. Jisas i kisim dai bilang ol. Em i kisim hel bilang ol.

- Na bihain, God i kirapim Jisas gen long dai bilang soim yumi olsem Jisas i winim pe bilang sin. God Em i gutpela God, a? Tru tumas!

God i mekim dispela wok bilang husat?

- God i mekim dispela wok bilang manmeri i tanim bel na i bilipim na trastim dispela wok Jisas i mekim na i bihainim Jisas. Taim Jisas i dai long diwai kros Em i kisim na pinisim kot na pe bilang sin bilang manmeri i tanim bel na i bilipim na trastim dispela wok bilang Em na i bihainim Em.

“Em (Jisas) i no bin mekim sin, na wanpela tok giaman i no bin kamap long maus bilong Em.”

1 Pita 2:22.

“Krais yet i hangamap long diwai kros na Em i karim sin bilong yumi long bodi bilong Em. Em i mekim olsem bai yumi lusim wei bilong sin na yumi bihainim wei bilong stretpela pasin. Em i bin kisim bagarap bilong oraitim yumi.”

1 Pita 2:24.

“Krais yet i no save liklik long sin. Tasol, bilong helpim yumi, God i mekim Em i kamap sin samting. God i mekim olsem bai yumi, long wok bilong Krais, i ken i kamap stretpela manmeri bilong God.”

2 Korin 5:21.

“God i bin salim Krai Jisas i kam, na Krai Jisas i kisim pe bilong sin na Em i dai, na blut bilong Em i kapsait bilong tekewe bel hat bilong God long sin bilong manmeri i bilipim na trastim Krai Jisas.” **Rom 3:25.**

Tupela rot i stap.

Wanpela Rot



Yu ken i givim baksait
long God i go yet.

Na yu ken i bosim laip
bilong yu i go yet.

Tasol.....

God bai mekim save
long yu.

Na yu bai fesim pe
bilong sin bilong yu
long hel.

Narapela Rot



Yu ken i tanim bel na
putim yu yet aninit
long Jisas.

Yu ken i trastim
dispela wok God i bin
mekim long dai na
kirap bek gen bilong
Jisas.

Em olsem na.....

God bai fogivim yu.
Na Em bai givim laip i
stap oltaim oltaim
long yu.

“Man i bilip long Pikinini, em i gat laip i stap gut oltaim oltaim. Man i no bihainim tok bilong Pikinini, em i no inap kisim laip. Nogat. Bel hat bilong God i stap long Em.” **Jon 3:36.**

“Tru tumas, Mi tokim yupela: Man i harim tok bilong Mi, na i bilip long God i bin salim Mi i kam, em i gat laip i stap gut oltaim oltaim. Em bai i no gat kot. Nogat. Em i lusim sait bilong i dai na em i kamap insait long laip pinis.” **Jon 5:24.**

Sapos yu harim ol dispela tok na yu tingim, “Bai mi mekim wanem?” Orait i gat 3-pela samting yu ken i mekim.

- 1. Prea long God.** Tanim bel na askim God na Em bai fogivim yu. Na askim Em long senisim yu.
- 2. Trastim Jisas.** Jisas i bin kisim pe bilong sin bilong yu taim Em i dai long diwai kros. Long dispela as God i ken i fogivim yu. Olsem na, yu mas trastim Jisas na trastim dispela wok Em i bin mekim bilong yu.
- 3. Stap aninit long Jisas.** Nau Jisas mas i stap bos bilong yu. Yu mas i stap aninit long Em na bihainim olgeta wei bilong Em.